

虎

苑

虎苑序

嘉靖癸丑王子甥於吳郡陸氏陸氏墓在花山竹塢塢深多亂泉怪石虎渡太湖來踞塢中食人不去又數月聞擒虎過陸丈門外人皆擁門觀王子出稍後虎已去從觀者問虎文甚奇王子歎恨不及見虎他日游山間尋擒虎處又觀虎磨牙檜檜皮如削心異之山人競來譚虎王子憶古書中及人間所聞虎事往往酬答之客好事者命牘牋記又趣王子梓王子謂虎猛獸談者色變不當梓客曰奚害夫六經聖人之文

皆談虎談虎奚害王子廼因類成篇分爲十四
德政美循良也孝感勵天親也貞符奏瑞也占
候驗術也戴義崇報德也殛暴明帝罰也威猛
示雄武也靈怪載妖凶也豢擾存貽害之旨搏
射垂傷勇之戒紀神攝以表仙釋之蹤紀人化
以抑獸行之慝紀旁喻以徵風譬之規紀樵志
以廣見聞之博篇成系贊其下客謂太簡王子
曰不然譬諸飲食梁肉取飽若夫山豆海俎指
多染卽厭矣于是請客命篇客謂曰虎苑云太

原王穉登序

虎苑目錄

卷上

德政第一

孝感第二

貞符第三

占候第四

戴義第五

殛暴第六

威猛第七

靈怪第八

卷下

參擾第九

搏射第十

神攝第十一

人化第十二

旁喻第十三

襍志第十四

虎苑目錄畢

虎苑卷上

太原王穉登著

德政第一

宋均爲九江太守郡多虎患前太守常募設檻
穽而猶多殘害均到郡下記屬縣曰江淮之有
虎猶河北之有雞豚今爲民害咎在殘吏而勞
厯張捕非憂恤之本也其務退奸貪進忠善可
一去檻阱除削課制後虎相與東渡江

劉昆爲弘農太守虎皆負子渡河詔問行何德
政致是對曰偶然耳帝曰此長者之言也

童恢爲不其令戶人嘗爲虎害廼設阱捕之生
獲二虎恢呪曰天生萬物惟人爲賢虎狼當食
六畜而殘暴于人王法殺人者死傷人抵罪若
虎殺人者俛首不然號呼一虎閉目如懼狀卽
時殺之一虎奮躍而去

魏世祖時有獻虎者問虎何食曰食肉詔曰下
民饜糟糠何忍以肉飼虎命虎貰射殺之

劉陵爲長沙安成長先時多虎百姓患之皆徙
他縣陵之官修德政踰月虎皆出境百姓復還
法雄爲南郡太守郡濱帶江沔雲夢藪澤多虎

暴前守賞募張捕乃更爲害雄下記曰虎狼在山林猶人居城市古者至化之代猛獸不擾皆由仁及飛走太守雖不德敢忘斯義記到其毀壞檻穽不得妄捕是後虎害遂息

王子香爲荊州刺史有德政卒於支江有三白虎宿衛其側垂首不動及喪去踰州境忽不見共樹碑文號曰支江白虎也

國朝于梓人楚產洪武中進士有異術歷官知登州有謫其親傷于虎者梓人命卒焚牒山中方燼而虎至帖耳隨行觀者如堵走伏庭下梓

房列一
二
人數其罪百笞之許其改過叱之出虎遂循故道而去

慈谿張昺成化間爲鉛山令虎食寡婦子訟于張張令去五日來廼齋戒爲文祭城隍神約五日內必驅虎伏辜不然廟當毀後五日天未明夢神告虎來張挾矢升堂二虎伏庭中不動張曰爾食吾民罪當歿二虎有不傷人者出一虎出一伏如故張善射引滿三中其首命卒亂鞭殺之召婦人歸其虎昺字仲明御史大夫楷之子所至有政聲

牟俸廉察江西夢虎身被三矢而登舟遂驚寤以告僚佐僉事胡某見牟性行躁謂曰得無獄冤耶牟艱然罷先是牟斷吉安女子殺夫獄有疑女許嫁貧士親迎時盜殺貧士塗中士之父疑婦家嫉其貧而殺之訟于牟牟怒不察因案女姦而謀殺其夫論死胡逮問女姦夫無所得使媪驗其女又處于間士與誰交密云同舍生周彪胡沈思曰虎三矢登舟彪也因傲彪修志旣至召彪密室引其手曰牟公廉知若事欲論極典吾憐若材止牟公第吐實當相援耳彪錯

懣即跪陳聞女艷故謀殺貧士圖妻女胡錄其
辭白牟遂出其女而論彪死焉

讚曰奕奕循吏仁孚異類負子挾羣涉波
以去穆矣弘農猗歟九江二君爲政
竹簡生香

孝感第二

楊香楊豐女也隨父田間刈稻豐爲虎所噬香
年才十四身無寸兵遽搯虎頸虎犇逸得免太
守孟肇之上其事詔旌門閭

區寶居父喪鄰人格虎虎趨入其廬即以蓑覆

之鄰人問竇竇曰虎豈可藏耶人遂去虎後送
禽獸助竇祭祀

定間郢州村民一姊一弟偕樵常日姊樵歸
爨弟樵鬻薪養母一日負薪歸虎逐弟登木爪
其裾姊拏虎尾呼曰虎食我無食弟弟歿母誰
養虎回視置之而去

成都章惠仲與妹壻丘生偕赴試出峽舟覆丘
歿焉章登第調并研主簿還及峽聞弟歿舍舟
乘馬疾行過萬州日黑馬仆墜厓下虎來銜章
髮章謂虎曰汝靈物當聽吾語吾母八十生子

二人女一人往年妹壻歿于江今年弟歿于室
獨吾一身存將竊升斗祿養母汝食我奈母老
何虎聞遽捨之天明章攀木而上廼得歸章赴
官母卒未幾亦卒乃知一念之善脫於虎口爲
母故也

朱泰家貧養母百里鬻薪親極滋味戴星伐木
虎負之去朱厲聲曰食我不惜母無托耳虎棄
泰于地去泰竟不歿里人以爲孝感醪金遺之
目爲虎殘

讚曰天親遘凶赴難如歸踴躍捍衛當者

披靡鬻鬻非儒爪牙非威鬼神祐之
共濟貼危

貞符第三

騶虞白虎黑文不食生物不踐生草不履生蟲
虎壽千歲五百歲者色白

樞星散而爲虎

虎窟山相傳燕濟南太守胡諮于此山掘得白
虎因名焉

虎正初名海涌吳王闔閭葬其下發卒六十萬
人治之葬三日白虎蹲其上因名

魏文帝將受禪郡國奏白虎二十七見

周永昌中涪州多虎有獸似虎而絕大逐一虎噬殺之錄奏檢瑞應圖曰酋耳也不食生物遇虎則殺之

讚曰白虎金精縞質玄章西方之宿匪禍伊祥聖人受曆寶圖皇皇孰謂於菟騏驎鳳皇

占候第四

虎奮衝破又能畫地卜食兵法曰將開牙門常背建向破其以此歟

虎行以爪坼地卜食觀奇偶而行今人畫地上者曰虎卜

虎交而月暈

虎嘯則風生

南山久旱以長繩繫虎頭骨投潭中有龍處水掣不定俄頃雲起雨亦隨降

虎威如乙字形長一寸在脇傍皮內尾端亦有之佩之臨官主無官人所媚嫉

晉武帝母李太后簡文時執役官中簡文無子令善相者相諸宮人相者指后當生貴子而有

虎厄帝幸之生武帝及會稽王道子旣爲太后服相者之驗而怪虎害無謂且生未識虎乃令工圖形戲擊之便患手腫而崩

班超微時相者謂燕領虎頭當爲萬里侯已而果然

沈僧照嘗校獵中道而還左右問何故答曰國家有邊事須還處分問何以知曰向聞南山虎嘯俄而使至

讚曰交維暈月嘯迺生風天文協應譬彼雲龍手萌后禍頭兆侯封靈占歷歷

符節攸同

戴義第五

郭文舉與虎撰去鯁虎送鹿報

長興邸姬山行遇虎銜入溪谷虎蹲姬前不食
姬曰莫有刺欲去否虎舉足示姬見爪下竹刺
拔去之騰躍數四銜姬至舊所不相傷夜置一
鹿于門而去

李叟家湖濱蠶月出條桑幼孫守室虎渡湖餒
甚入室見孫不食登豕牢食豕去叟歸尋豕甚
晏夜聞牢中虎嘯及豕鳴天明視之豕故在而

大過前豕蓋虎銜來報之也

讚曰蠢爾毛蟲懷德惟深黔首謂何下石
甘心黃雀玉環靈虵寶珠中山之狼
于爾何誅

殛暴第六

義興某人攜妻往歷陽附一舟長年悅其妻欲
圖之方艤舟給其人曰吾此地多相識留若妻
舟中吾與若先登陸同行至山下被毆歿長年
卽還舟刼其妻曰而夫歿于虎而無苦當與吾
偶妻哭謂尋得遺齒當從汝長年不得已漫挈

之往塗間遇虎徑攫長年而去婦見虎謂夫果
歿慟哭於途人問得其故云適自邑中來見人
慙爲舟人毆歿復甦豈爾夫耶婦詣尋之果其
夫更生云

乾道中江西水災豐城農夫挈其母及妻子就
食他所過小溪密語妻曰穀貴艱食豈能俱生
我視兒先渡母老不能來可弃之婦不忍掖姑
以行足陷泥淖方取履見白金爛然在水中拾
得之語姑曰本爲貧徙今幸天賜可歸矣登岸
其夫不見兒戲沙上問之云被黑牛銜入林

中入林視之流血丹地已爲虎食矣

大德中荆南九人山行避雨入土洞中虎來踞
洞口視眈眈八人密議排一人愚者出啖虎虎
當去虎得人銜置他所坐如故須臾洞崩八人
死愚者竟生

義興陳氏婦豔而孀居家鄰木客客悅其姿莫
能犯乘夜登垣昇木宣其庭詰旦指爲竊訟于
官婦事玄壇神素虔慟告神夢神曰令吾虎報
爾仇未幾客偕侶山中伐木黑虎躍出叢竹噬
客去失喪魄久之

讚曰暴夫茹柔傷彛叛倫神實禍淫匪虎
噬人天討有嚴帝命有虔斧鉞奚事
元凶殲焉

威猛第七

虎類能識人氣未至百步輒伏而嗥聲震山谷
須臾奮躍搏人

虎骨甚異雖只尺淺草能身伏不露及唬然作
聲則巍然大矣

虎中有真虎真虎不可射其見射於裴旻者非
真虎也

虎不食小兒兒癡不懼虎故不得食并不食醉人必俟其醒始食非俟其醒俟其懼也

虎饑亦啖菓實不特獸也凡食人男子自勢婦人自乳惟不食婦人之陰

虎不行曲路遇之者引至曲路即可避去

虎食犬則醉犬乃虎之酒也

虎搏兔先于四圍遺溺兔不能出坐受其搏

虎爲獸長亦曰山君

虎豹之駒雖未成文已有食牛之氣

讚曰高山大壑窟宅深藏藜藿不採狐兔

潛亾武臣洸洸龍旂鳥章妖氛清明
萬國來王

靈怪第八

鬪伯比淫于邳女生子文焉邳夫人使弃諸夢
中虎乳之邳子田見之遂使収之楚人謂乳穀
謂虎於菟故命曰鬪穀於菟

虎殺人能令屍起自解衣此倭鬼所爲也

開元中韋知微爲蕭山令縣多山魃變幻爲害
前後官吏多被其禍知微至究其窟宅烈火焚
之邑中寂然一日有客稱蘭陵蕭慥來訪知微

房苑一
談鋒捷麗辨敏無雙知微甚加顧重客出懷中
小合有獼猴大才如栗謂知微曰此猴雛出峽
所得宛轉可玩輒當相贈知微奇之誇示于內
猴忽騰躍化爲猛虎兵仗無施闔門遭噬予遺
無有矣

周象好獵爲汾陽令夢乳虎相逼驚寤得疾僧
海寧過其門謂鄰父曰此有妖氣當爲禳之象
聞召僧僧仗劒禹步誦呪入門直至寢所遶牀
數匝叱之忽聞牀下虎吼家人奔駭象不覺投
牀下歿僧命水嚙之須臾如故

長慶中處士馬拯馬沼約遊衡山拯先至見虎
睂僧舉動樸野邂逅歡甚倩拯僕隨下山市鹽
酪俄頃沼至云山下見虎食人訖他爲僧拯詢
知是已僕方駭顧僧亦來口血尚殷二人給僧
云井有怪物因共窺井推僧墜井中乃虎也下
石壓殺之急趨歸日已暝見獵者張機道傷召
二人宿棚上曰虎方暴不可歸二人從之薄暮
猛虎觸機矢貫心死忽見僧道男女舉羣至號
哭云殺我禪師讐未復復殺我將軍耶二人叱
之曰爾俚無知生爲虎食死爲虎役今幸虎死

又哀哭之何故哉于是諸俵犇散終不知禪師將軍者虎也

景雲元年蕭志忠爲衡州刺史臘日將畋先期樵人薪于霍山夜半月白見長人衣豹皮角而光芒虎兕狐狸千百從行自稱玄冥使者奉帝命以若屬充蕭使君畋數羣獸哀號不起使者曰當求解于嚴四樵人施從至東谷中黃冠坐虎皮上使者告之故黃冠曰蕭公仁者本順時令若滕六降雪巽二起風當罷出矣命狐狸求美女醇醪書朱符分餉之羣獸皆懽鳴黃冠噉

曰昔爲仙子今爲虎流落陰厓足風雨更將斑
毳被余身千載青山萬般苦樵人歸未明而風
雪暴至蕭公罷畋矣讀其詩知嚴四爲虎也

大中間竇茵秀才假大僚莊于南山下月夜有
斑寅將軍來謁氣貌雄武自陳斑氏出於鬪穀
於菟有文斑之象因以爲姓後漢斑超生而虎
頭封侯萬里某故將種官虎賁中郎將比因得
罪竄伏山林耳遂朗吟一章曰但得居林嘯焉
能當路蹲渡河何所怯終是怯劉琨霜甚疑之
遽辭去及明視門外惟虎蹤而已

清源陳褒隱居別業臨牕夜坐外皆荒野月正
明見婦人騎虎過牕下徑之屋西先有婢臥屋
壁下婦人取竹枝從壁隙中刺婢即呼腹痛起
出戶如廁褒駭愕未及言婢已爲虎所攫遽抹
之得免鄉人言村中恒有此怪蓋虎俚也

陳郡謝玉爲瑯琊內史在金城其年多虎暴有
一人乘小舫載少婦插刀著船舷婦登岸便爲
虎銜去其人拔刀逐之口呼鍾山蔣侯求助卽
有黑人來導行入虎穴虎子聞聲謂母虎至皆
走出卽刺殺之隱樹間良久虎來倒牽婦入穴

中其人以刀斫斷虎脰虎歿婦故活夜夢黑水人云蔣侯生汝知否還家殺猪祠焉

建炎間荆南多虎郭外人多移家入城避虎張四者移未畢而虎至急竄于梁虎升堂蛻皮化為丈夫出門尋張張下取皮置梁上虎還失皮甚窘探懷中丹符陳于地曰吾奉天符取若等姓名都除惟若在耳能還我皮當捨若張曰除我名迺還汝皮虎出筆除之張擲皮下虎蒙皮復故形咆哮大躍張震駭幾墜虎去明日六十里外雷震殺虎

資州趙媼業乳醫夜聞扣門方出應爲人負去
行如風至石厓下語趙曰爾無畏吾虎也吾妻
方產能全吾妻當謝爾黃金入穴見牝虎坐蓐
趙爲收得虎子卽負趙歸明夜聞人呼曰謝抹
妻子五里外虎殺一僧衣下黃金汝取之平旦
如言往果得金

荊州陟岵寺僧鄒照善射言夜格虎時必見三
虎竝來撲者虎威在中者虎虎威入地得之
可却百邪虎初歿時記其頭枕處月黑夜掘之
掘時有虎吼不足畏此虎之鬼耳掘三尺當得

物如琥珀蓋虎目光淪入地之所爲也

義興多虎成化間邵某設機于路虎過中箭跡之不獲明日行山廟見土偶股間箭在焉令聞而毀其廟

又總兵趙輔征廣西蠻見羣虎飲溪中趙引弓射之中其魁帶箭去明日邏者于古廟中見神被箭集脇間趙神之新其廟不若前令之毀爲得云

陸丈外舅先隴在花山竹塢中林壑幽迴往季多虎墳鄰人帶月採茶見白袍丈人謂曰去去

虎且至倉皇升木見一羣流血人來繞樹數匝云走却也當是茶中人洩之矣悵悵而去須臾虎至過岡度前嶺其人趨歸語其妻但不解茶中人何謂傾宮視之乃龕中木偶也先是此偶在山廟中拾得之龕事於梁中夜鼠鬪墜宮中不之知及是乃悟遂金身石屋虔奉焉

讚曰鬪生弃野猛虎飼之匪虎飼之惟神賜之爲鬼爲魅又曷使之妖不勝德正直耻之

虎苑卷下

太原王穉登著

參優第九

梁鴛曰且一言我養虎之法夫食虎者不敢以
全物與之爲其碎之之怒也不敢以生物與之
爲其殺之之怒也虎之與人異類而媚養已者
順也故其殺之逆也吾豈敢逆之使怒哉亦不
順之使喜也何則喜之復也必怒故曰不處中
和勢極則反必然之數耳

孔公文韶爲廣西按察使艤舟江口鄰舟有占

城人進虎京師延公過舟虎在圈中毛色炳煥
一夷人能馴虎開圈弄虎手探口中略無所損
戲其足輒退縮夷人言虎惜爪距故也又呼其
名卽長吼孔駭然而退

董奉爲醫術甚神種杏成林人來謝者使益種
杏杏實時虎守杏不去

江口孫御史夫人養一乳虎甚馴著牀屏間玩
弄如意後虎漸大夫人歸寧扁虎室中五日方
還虎枵甚見夫人便作搏噬狀夫人大驚命格
殺之

扶南王范尋常蓄生虎人有訟未知曲直輒投虎虎不噬則爲直于是蠻貊之人祀虎爲神

讚曰猛獸野心反噬非久出柙遺害咎歸典守上林清風嗇夫緘口破樊脫檻率壙以走

搏射第十

卞莊子性好勇嘗刺虎館豎子止之曰兩虎方食牛牛甘必鬪則大者傷而小者亡從傷而刺一舉當兩獲莊子然之果獲二虎

李禹有勇 帝使刺虎縣下圈中未至地有詔

引出禹以劒斫絕纍欲刺虎上壯之

李廣在北平出獵見草中石以爲虎射之中石飲羽視之石也明日更射不復入

李廣與兄弟獵于宜山見臥虎射之一矢卽殪斷其頭爲枕示服猛也鑄銅象其形爲洩器示辱之也今人作虎枕自廣始又謂洩器曰虎子穆天子時有虎在葭中七萃之士曰高奔戎乃生捕虎而獻之天子命桉而蓄之東虞是曰虎牢

孫權好畋長乘馬射虎虎突前攀馬鞍張昭變

色諫權謝曰年少不能慮事然猶不能已命作射虎車

周處年少時凶彊俠氣爲鄉里所患又義興山中虎長橋下蛟竝皆暴犯人謂三橫而處尤劇處聞有自新意便射殺蛟及虎虎名邈跡乃白額虎也

天寶中緱氏縣太子陵仙鶴觀每年九月三日夜卽有道士一人上仙張竭忠爲令不信命勇士執兵夜覘之三更後見黑虎入觀嚙一道士射之不死乃弃道士而去其年遂無上仙者明

日令大獵石穴中格殺數虎得金簡王錄冠帔
骨髮甚多皆前時上仙者也觀遂廢爲陵使之
居

勝國時張興祖萬戶善射虎平生射殺十數虎
他日遇虎一發而踣語人曰聞生虎鬚可療齒
因拔之虎氣垂絕猶爪裂其鞞人遂目之爲殺
虎張

黃埭阮棊有膂力溪行遇虎突入其舟阮前抱
虎腹相持入水踰時迺出虎逸去阮歸晝寢猫
登其榻夢中驚呼虎至戰汗歿

肇慶人言其鄉有人善捕虎者持藥矢蔽林中聚薪燃火有虎與熊偕來附火人潛發矢射中熊喉熊拔矢怒視虎已而痛甚卽拔巨木擊虎虎死熊繼之遂兩獲焉

孔公文韶宰都昌時一卒長身多力夜行遇虎乃登木木無巨榦虎怒齧之欲仆卒躍下持虎久不解道無行人語虎曰吾與若俱力盡捨之恐見食卽不食我當三號虎便三號卒縱之掉尾而去

義興王昌六絕有力能拔樹嘗之野見人持鎗

逐虎王取槍屈折之笑曰槍柔若此虎烏能歿
哉按道傍巨竹剡其末未竟而虎來張頤向王
王以竹貫其喉更持虎兩足擲林中則已僵矣
陸丈童子師包君家龍丘山中地多虎與妻家
隔嶺居妻弟某生素剛愎夜飲包家昏黑欲歸
不能止登嶺月出一虎蹲石上見人方張頤未
及踴躍生遽以韉趯之趨歸視韉已裂矣明日
嶺上行人言虎脫頤歿

山西有人善搏虎蓄一弓極勁出必自隨一日
官命捕虎山中使其侶將弓以從道語間虎出

于薄亟呼弓來其侶倉皇悞以他弓與之而將
弓者逋矣柔不堪用應手折其人以手把虎足
虎人立而吼虎領骨極堅抵擊不已賴有鐵憤
可禦不然碎首矣日且黑道無一人其人恐更
有他虎當不可禦遽伸臂與虎一啣而虎死焉
蓋虎性甚耿有不如意即憤極須鬻人乃死其
人識虎性故假手殺之吾吳中人官山西親見
之召至啓其臂傷痕尚新也

讚曰徒博稱暴輕生奚取雅歌不敢風云
傷汝飛將射石飲金沒羽聖行三軍

嗟嗟誰與

神攝第十一

仙人鄭思遠長騎虎故人許隱病齒求治鄭曰
惟得虎鬚及熱挿齒間當愈卽拔數莖與之因
知虎鬚治齒也

老彭設大夫也姓錢名鏗歷夏至殷八百餘歲
歷陽有彭祖仙室常有兩虎在祠左右前世禱
請風雨莫不輒應祠訖地卽有虎跡云

東海黃公能御虎佩赤金刀以絳繒束髮及衰
老力憊飲酒過度不能復行其術秦末有白虎

見于東海黃公乃以赤刀往厭之術旣不行遂爲虎所殺三輔人俗用爲戲漢帝亦取以爲角觝之戲焉

介象入山求神仙臥石上有虎舐象額象寤謂虎曰天使汝衛我者汝留若山神使試我者汝去虎乃去

吳猛有道術同縣鄒惠政迎猛夜于中庭燒香虎來抱政兒超籬去猛語云無所苦須臾當還虎去數步忽送兒歸

賢州僧結菴龍虎山下嘗赴齋市人家倩四僕

肩輿以行至卽從主人求密室閉僕其內加扇
鑰戒勿與食主人念僕遠來不當令枵腹俄聞
咆哮走視之皆虎也驚悸毛竦爭來言僧但微
笑齋罷啓鑰喚出依然僕也遂舉輿去蓋始以
法攝制山中虎耳

上官昶有神術能捕虎長樂謝士元守建昌虎
近郭噬人士元自往捕之兵衛甚盛昶過見之
笑曰捕一虎何輒張耶守知其神召問之曰第
令衆人毋呼我姓名聽我指使虎易制耳乃令
束芻燃火先行毋伐金鼓旣至虎所虎踞竹林

中袒被髮而進以袖拂虎頭虎不動遂乘之以
行觀者塞道及郭門一人呼曰官先生騎虎來
矣虎遂回首齧袒足袒亟呼獵徒叢稍刺殺虎
人問袒何術曰玄壇法也蓋道家謂玄壇神能
伏虎耳

讚曰至人御虎身尊道高馴服無忤如豕
于牢黃公習幻絳繒赤刀術衰乃歿
角觝遺嘲

人化第十二

牛哀病七日化而爲虎其兄啓戶而入虎搏殺

之方其爲人也不知其將爲虎也及其爲虎也不知其嘗爲人也

宣城太守封邵化爲虎食郡民民呼曰封使君時人語曰毋爲封使君生不治民反食民

隴西李微皇族子恃才倨傲東遊吳楚莫知所適明年微故人李儼使嶺南至商於界有虎騰出草中見儼匿身言曰故人知我乎我李微也往年歸汝墳病于逆旅夜聞人呼走出山谷間不覺以手攫地而步視髀間斑毛茁然心惡之臨溪顧影已爲虎矣初食狐兔旣乃噬人今其

骨髮故在崕下耳行負幽明化爲異類奈何故
人言罷大慟托儼周其家甚哀懇儼回車登嶺
見虎吼林中聲震巘谷後從南中取他道歸不
復由此矣

趙不易爲江陰軍僉判妻病火食絕不食惟啖
生肉與趙隔寢婢媵侍疾者輒病歿不朞月更
三人皆歿老兵持肉自戟門入怒不食自後圃
卽食之趙後待闕衡州妻白晝化虎而去人謂
戟門有神而三婢者遭其乘夜吮血故殞焉
葉薦妻讒妬葉七十始蓄一妾妻卽求離異築

室山後居焉家人日夕省候葉謂不復妬令妾
訊之日落不返親詣其處門戶深扃破關而入
則妻已化爲虎食妾盡矣

劍州李忠因病化爲虎初忠病久其子買藥歸
而省父忠視子朶頤涎流子驚視父已作虎形
出外扃其室穴壁窺之迺真虎矣

乾道五年趙生妻李氏病頭風家人聞虎吼走
視之化爲虎頭問之不能言但隕淚撫其幼子
與飲食不復食但食生肉日飼數斤久之迺死
李生時凶悍人謂惡報云

讚曰凶悻濟惡獸心是騁戴弁戕戕猛踰
獬獬五內旣乖化爲異類倏焉咆哮
咥人不顧

旁喻第十三

易曰大人虎變其文炳也

孔子適楚有婦人哭于路而哀使子貢問之曰
爾之哭重有憂乎曰然子貢問其故曰吾舅死
於虎吾夫又死焉今吾子又死焉是以哀之子
貢曰奚不去也曰無苛政孔子聞之曰小子識
之苛政猛于虎也

齊饑陳臻謂孟子曰國人望夫子復勸王發棠
孟子曰是爲馮婦也馮婦善搏虎有衆逐虎虎
負嵎莫之敢撓衆望見馮婦趨而迎之馮婦攘
臂下車衆皆悅之爲士者笑之

龐共與太子質于邯鄲謂魏王曰今一人言市
有虎王信乎王曰否二人言王信乎王曰否三
人言王信乎曰寡人信之共曰夫市無虎明矣
然而三人言成市虎今夫邯鄲去魏遠于市議
臣過于三人願王察之共從邯鄲還果不得入
呂蒙欲從軍母止之蒙曰不入虎穴焉得虎子

曹公擒呂布布顧劉備曰玄德卿爲坐上客我爲降虜今縛我亟獨不可一言耶操曰縛虎不得不亟也

韓子曰虎之能縛狗者爪牙也使虎失其爪牙而使狗用之則反伏於狗矣

司馬遷曰猛虎在山百獸震恐及在陷穽搖尾而求食積威約之漸也

劉夢得守連州替高霞寓高後入爲羽林將軍承眷顧附書夢得欲請自代劉答書云昔有姬行山中遇虎虎舉足示姬見有芒刺爲拔去之

虎感奮而去及歸擲麋鹿狐兔於嫗家日無虛
焉一旦忽擲死人入村人執嫗爲殺人嫗說前
事得釋乃登垣語虎曰感則感矣叩首大王更
不拋人來也

解學士縉應 制題虎顧衆彪圖云虎爲百獸
尊誰敢觸其怒惟有父子情一步一回顧

文皇素不悅 仁宗聞此惻然卽遣夏原吉迎
於南京可謂善諷者矣

讚曰苛政傳譏大人易著君子見幾耻爲
馮婦良臣善諷比物援類大君納約

罕譬而喻

襍志第十四

爾雅曰熊虎醜其子狗絕有力麋

漢律曰捕虎一購錢三千其狗半之

記曰迎貓爲其食田鼠也迎虎爲其食田豕也
詩曰有貓有虎注謂貓似虎而淺毛疑卽俗所
謂山貓耳非如人家所蓄者蓋貓亦食人特其
威猛亞于虎云

易曰虎視眈眈其欲逐逐

三九者陽氣成故虎七月而生陽立於七故虎

首尾長七尺般文者陰陽襍也

淮南子曰虎不可使緣木

風俗通曰人卒得病燒虎皮飲之繫之衣服亦辟惡

縣虎鼻門上宜官子孫帶印綬縣虎鼻門中周歲取作屑與婦飲之生賢子勿令人知知卽不驗亦勿令婦見之

神荼鬱壘兄弟黃帝時人能執鬼鬼有禍人者以葦索縛之投食虎於是官常以臘除畫虎挑人于門

方言虎陳魏之間曰李父淮楚之間曰李耳注
謂虎食物值耳而止以觸其諱

百體書中有虎 召奏用虎爪書不可學以防
詐僞

山蕭一名山臊能役虎害人

周禮方相氏歐罔象罔象好食亾者肝而畏虎
與栢故墓上置石虎樹栢爲此也

二廣俗好於門畫虎頭書漸字

仙藥中有虎脫齒

蝟能跳入虎耳

滑無骨入虎口虎不能噬處虎腹中自內嚙之
今云蠻夷猾夏取此義

虎鷹能飛捕虎豹身大如牛翼廣二丈

虎鬚草江東人織以爲席

禽蟲之善搏生者多稱虎如虢曰蠅虎鳩曰魚
虎守宮曰蠍虎土附曰蝦虎鳩鵲剖葦食蟲曰
蘆虎皆以其善食是物而有是名

士子初登選及遷除朋僚歡燕謂之燒尾說者
謂虎欲爲人惟尾不變須焚之乃變故燕以名
海中虎頭白皮料影三種鯊魚皆能變化

桀之女樂三萬人投虎于市觀其驚駭

子華少學公羊十四舉孝廉到洛陽遇虎爭一
羊乃瞋目按劒斬羊腹虎各以其半去

秦召公子無忌不行使朱亥奉壁一雙秦王怒
令著亥虎園中亥瞋目視虎背裂血濺虎不敢
動

大觀間昌化山中居民夜聞虎鬬聲甚厲已而
寂然殆曉視之見二虎頭入蹄而已意方鬬時
別有猛獸遇而兩食之後有見異獸于山中金
毛五文狀類獅子是必食虎者也然不知其何

名

韓蘄王夫人京口倡也嘗五更入府賀朔見虎
蹲臥廊間駭甚趨出不敢言已而衆至復往視
之迺啞卒也蹴之起問姓名爲韓世忠心異之
歸告其母具酒邀韓約爲伉儷蘄王後賁遂封
兩國夫人

宋丞相范文穆公好談虎捕軒曰說虎
被虎傷者當啖菜油三四盃

龍丘山農家窶甚里胥至欲烹抱雛母雞爲供
其胥恍惚見黃衫女前拜乞命俄失所在入羣

見其家縛雞胥不許去數日復來雞已抱出一
羣雛見胥飛鳴作相感狀胥出門遇虎幾欲近
忽一雞飛撲虎眼胥得逸去却還其家已失雞
問之云朝來飛去胥具述虎事共往尋之雞已
折翮斃草間自是山中不復食雞

龜山趙氏乳犬引雛行虎來攫母犬趙持矛呼
衆逐虎虎趨捷莫能及雛犬悲鳴銜虎尾虎憚
追莫敢回顧帶之而走骨性榛棘灑血殷地終
不肯釋虎爲犬係累薛逸稍遲遂遭追及歿于
刃下矣

魏明帝于宣武場上斷虎爪牙縱百姓觀之王
戎七歲亦往看虎承間攀欄吼觀者辟易顛仆
戎湛然不動了無恐色

梁王徐知諤嘗遊秣山除地爲廣場編虎皮爲
大帷率僚屬會其下號曰虎帳忽暴風飄帳碎
如飛蝶知諤心惡之歸數日病卒

吳俗好鬪蟋蟀用黃金花馬爲注里人張生爲
之屢負禱于玄壇玄壇張所素奉夜夢神云遣
吾虎助爾在北寺門下張覺往尋之獲黑蟋蟀
甚大每鬪輒勝獲利甚豐久之乃歿

陳氏家義興山中夜聞虎當門大號開門視之
乃一少艾雖衣襦凋損而妍姿不傷問知是商
女隨母上塚作寒食爲虎所搏至此陳婦見其
端麗諷之曰能爲吾子婦乎女謝惟命乃遂配
其季子踰月其父母蹤蹟得之喜甚遂爲婚姻
目曰虎媒

趙南仲丞相居溧陽私第作圈養四虎圈近火
藥庫藥焙遺火衆砲倏發地震屋傾四虎悉斃
人以爲駭

元時外夷貢獅子虎頭狗身形色不類官中以

爲非真夷人牽入虎牢虎皆帖伏不敢動獅遂溺于虎首虎益懾懼由是信爲真獅子也

宣德間程雲南爲尚寶一日被召至虎城傍門啓虎突出程驚呼不已上大笑蓋虎去爪牙上特用戲之耳

國朝劉馬太監從西番得一黑驢進上能一日千里又善鬪虎上取虎城牝虎與鬪一蹄而斃又鬪牡虎三蹄而斃後取鬪獅獅折其脊而斃大慟蓋龍種也

讚曰六經譚虎聖人之書班班載籍雲爛

星垂分篇割牘採綴紛紜蒙茸支離
裨益多聞

虎苑卷下 終

王先生作廬苑垂三十年流傳既久索者
愈衆而元本乃楮材不勝速朽之歎齋居
之暇鳩集梨棗授工重刻於是容有見徵
無不立應其如人人色變何

萬曆甲申中秋日晉陵吳近道題

常州府顧塘橋
吳氏蕭踪齋雕